



Fasnacht 2015

## Alti Basler Dante

sit 1947

### Wämmer oder wänn dr nit?

Doo letschti liig y, mied vom Schaffe,  
dehaim e uff em Kaanebee,  
nyt luege, loose, lääse, däät nyt me raffe  
und d'Gnoche dien mer au no wee.

E Zeedel schryybe yber Stadt und Land  
Dasch alles anderi, as e lyychte Väärs.  
E Gschicht mit weenig uss erschter Hand.  
Kennt me nur schwääbe in dr Zyt, das wäär's!

Nadyrlyg stoot alles gschriibe in de Anaale,  
siibe Mool het me scho Aalauf gnoo,  
sit Basel und sy Land mit Quaale  
dailt und in zwai Stigg isch koo.

Aber as Schryyber, doo suechsch elai  
doch numme die ganzi Woored!  
Mechtsch wisse, was si wiirgglig gspyyrt  
und gmacht hänn, sälbetsmool vor vyyle Joore.

Doo gheer ich pletzlich Stimme wo dien zangge,  
schrägg uff und dängg: Was isch jetzt gschee?  
Het my Zimmerlinde ebbis mit mir z'rangge?  
Ooder isch's em Änd dr Schnee,  
wo druggt däm zaarte Wäase uff sy Gmiet?

S'deent uss dr Kuchi, wird lut und lytter,  
d'Weerter wäarde bluemiger und runder,  
doo dien zwai strypte, als wie schytterer...  
do phaggt mi denne doch dr Gwunder.

Lueg um dr Egge, bi bass verstuunt,  
zwai Stääbli, rot und schwarz,  
steen uff em Kuchidisch  
und sin ganz fiirchterlig schlächt gluunt...  
Oouuhh, däane stinggts, wie alte Fisch.

Dr schwaarzi Stab isch grad em schimpfe  
Und schittlet s'Kepfli hii und häär:  
*„Diend dir in Lieschdel Dummhait impfe?  
Das isch doch alles nit so schwäär!  
„Zämme“muess unser Credo syy,  
do muesch du nimme mit mir kääre!  
Elai - kaa's kain me richtig mache.  
Loos Siibedupf, luegs doch nur aa,  
s'Zauberwort haisst „Synergie“.  
Bim Tram, bim Spitel mien mir's haa.  
Au s'Ballet de Bäle wuurd ooni  
nimme die ganz groos Wältklass syy!*

*Stryych d'Helfti, vo sälle wo regiere.  
Uss zwai mach ains und ooni Hoon,  
muesch nit emool pressiere,  
halbiersch uff ai Schlaag au grad no  
die ganzi Korruption.  
Goot's dir nit ändlig, ändlig uff  
was me doo noo alles spaare kaa?*

Doo glepft's em roote Stääbli  
grad jüschtemänt dr Graage,  
är stampft und fuschtet, wird noo reeter  
und duet dr schwaarzi Baslerstaab  
rund umme aafu jaage:

(im starken Landschäftler Dialekt)  
*„Duuu schwarze Pfupf, ich will's dir sääge,  
miir Baselbieter wei doch sälle  
ganze Mischd nid fiere!  
Dasch alles numme Luug und Bedruug  
und diir weid's duureschtiere!  
Miir gän kei Schtutz,  
scho gar nid Millione ab,  
für e Verfassigsvorschlag ooni Nutze,  
das goot grad au bachab!  
So abkläärt wie das doo dööne duet,  
eus haut's dr Bändel ab em Huet!  
Miir wei keini hööchere Schtüüre haa  
und au kei Asylante – Bässlerguet!*

*Vo Schönebuech bis Ammel,  
miir Rämmel wääre nur die Dumme,  
jetzt isch ändgültig fertig, umme!  
Nie mee nach dr Schtedter Pfyffe danze!  
Eus dreits dr Ranze ab däm Ganze!  
Vergässed dä Fusions – Tootetanz  
und bsinned euch zrug an d'Hülfteschanz!“*

Do git's e Gnall, e Fall - herjee  
und ich liig nääbe-n-em Kaanebee.

E Draum ooder wiirgglig? Y bliib no-ne Wyyl  
em Boode und mues das zeerscht verdaue.  
Isch es doch eso wyt ewägg, das Zyy!  
Hänn sich denne alli eso verhaue?  
Isch's iberhaupt no mentschemeeglig,  
die baide Halbe as Ganzes zämmebaue?

S'steen Gsetz, alli Lyt und Zyt enand  
ganz schwäär und fescht im Wääg.  
Kemmet, mer mache doch eso zwai, drey  
nätti „Zämme-Schäfferle-Verträäg“!  
Mira, uff fimf, zää, zwanzig Jeerli blaane...  
Verträäg sin besser und me kunnt au  
niene-n-aane!

Wo spiilt d'Macht?  
Bref gsait, hinder dr Kulisse!  
Ewägg gää, wäär jo au,  
sich sälber welle bschisse!“

In däm Druurspiil, Quote versus Stimme,  
zaigt sich noo lang kai Änd.  
Mir Fuessvolgg hänn's doch lengschters,  
nimme in de Händ.

Ooder doch?

Im Glaine goot, was im Groose stoot.  
Mer mache's aifach, ooni diggs Bapyyr,  
e Leesig uss dr Waage – Noot.  
(P.S. fyr das bruuchts au kai Styrr!)

S' wäär Zyt, as sich die Grooskepf bsinne,  
Hülfteschanze hii oder häär.  
Isch's noonig yyne, noonig dinne?  
Es wäär doch scheen, im Liedli z'jubilere:  
„Vo Ammel bis nach Rieche,  
do woone gschiiidi Sieche!“

ABD mit BASIWA, e Mischterli wo glänze duet  
Zämme schaffe, dängge, reede, lache.  
Baidi hänn's und kenne das ganz guet.  
Stadt und Land, e weeneli Muet,  
voor däm Rezäpt lipf ych dr Huet.  
Vyl Fraid und leend's rächt grache!  
Eso duet me **zämme** Fasnacht mache!

\*\*\*\*\*

*D Ladäärne-Uusstellig isch uff em Minschterblatz und  
D' Waage- und Reggwisyte-Uusstellig isch bi dr  
Kasäärne vom Määntig znacht bis am Mittwoch demoorge.*

\*\*\*\*\*

Druck: Oberli Druck und Medien GmbH